



Synfocity = 709

mail us at : mzsynfo@gmail.com; mizoramsynod@gmail.com - Phone - 2314648

November 1, 2018

- ❑ **Synod Committee peng hrang hrang an thu**
 Synod Inkhawmpui atana Synod Department hrang hrangte inruahman lawkna Committee chu Oct. 22, 2018 (Thawhtanni) atang khan neih chho zel a ni a, Oct. 29, 2018 (Thawhtanni) khan Theological Education Board Committee an thu a, Oct. 30, 2018 (Thawhlehi) khan Hospital Board Committee an thu a, Oct. 31, 2018 (Nilaini) khan Pastoral Committee an thu leh a ni. Vawiin (Nov. 1) hian Education Board Committee an thu a, Nov. 2, 2018 (Zirtawpni) hian SL&PB Committee an thu leh ang.
- ❑ **Khawvel Sunday School Ni**
 Nov. 4, 2018 (Pathianni) hi Khawvel Sunday School Ni a ni a. Khawvel Sunday School Ni hi Dr. George W. Bailey, Tabernacle Presbyterian Church, Philadelphia Kohhran Upa rawt chhuah a ni. Kum 1907-a World's Sunday School Association Convention Rome-a neih tumah leh kum 1910-a Washington-a Convention neih tuma an sawihona bawhzuiin Kum 1910 May 22 atang khan Khawvel Sunday School Ni hi hman tan a ni. Khawvel Sunday School Ni hmasa ber programme hi tawng chi hrang hrang za chuanga lehlin a niin copy maktaduai tam tak khawvel ram hrang hrangah thawn darh a ni. Mizoram chuan Khawvel Sunday School Ni hi kum 1944 atang khan serh tan a ni a. Kum 1949 atangin Khawvel Sunday School Ni chu Thupui neiin November Pathianni hmasa berah hman thin a ni ta a. Kum 2001 atangin Naupang lam puala thupui zirtur buatsaih tan a ni baw. Mizoram Presbyterian Kohhran chuan hetiang hian thupui an zirho ang.
 Puitling - Billy Grahama-a Chanchin - Ziaktu Upa Dr. H. Vanlalhluna
 Naupang - Ngaihhlut tur dik - Ziaktu Dr. A. Lalchhandami
- ❑ **Bolivia (South America) atangin Mizoram Synod rawn tlawh**
 Bolivia atangin Mizoram Synod rawn zir chiang turin mi 5 an lo kal a, Mizoram Synod-in a lo mikhual a ni. Bolivia atanga lo kalte hi Synod Mission Board Missionary Pu Albert Kawldingliana leh Dr. Lalsangpuii te nupain Bolivia-a an thawhpui thinte an ni a. India rama Kristiante dinhmun rawn thlithlai tur leh Mizoram Synod, a bik takin Kohhran Hmeichhiate Buhfaitham rawn zir chiang tura lo kal an ni ber a, Synod Conference Centre-ah an thleng a, Kohhran inkhawm hrang hrangah an tel bakah Synod Office zing inkhawmah te an tel baw a. Mizorama Kristiante atangin zir tur tam tak hmuin an inhria a, Mizoram an rawn tlawh hi hlawk an inti hle a ni.
 Bolivia atanga rawn kalte hi:
 Rev. Dr. Luis Romay leh a nupui Mrs. Elizabeth Romay (Bolivian)
 Rev. James Wolheter leh a nupui Mrs. Jennifer Wolheter (American)
 Rev. Adrian Lovel (Australian)
- ❑ **P.C. Girls' School Exhibition on Science, Art and Craft**
 Aizawl DC Dr. A. Muthamma, SSA Aizawl District leh Pratham Science Foundation, Mumbai hmalakna 'RAHBI' Pilot Project kal zelah Oct. 26, 2018 (Zirtawpni) khan Science zirna lam tihhmasawna turin P. C. Girls' School chuan a wawi khatna atan zirlaite tan Science Exhibiton and Handicraft Exhibition an buatsaih a, Rev. B. Sangthanga Executive Secretary i/c Education-in a hawng.
 He hmalaknain a tum ber chu hmanraw changkang leh tha pawh hmanng chuanga lova naupangte rilrua science nihna hriattira tuh a ni a. Enchhinna leh a taka zirna kal kawppuina hmangin Pratham/RAHBI hian heng a hnuaia mite hi ti tur hian naupangte a fuih ta zel a ni.
 1. Mahni ngeia enchhinna a, buatsaih a, model hrang hrang siam a, an hriatthiamna atanga hrihfhah.
 2. Bungrua leh hmanraw hrang hrang hman dan thiam.
 3. Kan chhehvel zir thiamna nena daidan.
 He hun hi zirlai naupangte bakah zirlai nu leh paten an hlut hle a, zirlai kal chhuakte leh sawkar hotu lam atang pawhin chhimtu thahnem tak an awm a ni.
- ❑ **Praise On 2018 top 10 ten intuaitharna**
 Oct. 30, 2018 (Thawhlehi) chawhnu dar 4:00 khan Aijal Club-ah Praise On 2018-a top 10-a tlingten intuaitharna hun an hmanng a. Upa F. Lalthanmawia, Praise On Organizing Committee member-in a kaihruai a, Upa Zothanmawia, Khatla leh Praise On Judge dangte hnen atangin fuihna thu ngaihthlak a ni a, sawihona te neih zui nghal a ni.
 Praise On top 10 te hian November ni 6 leh ni 8 zanah Mission Veng Kohhran Hall-ah intihsiakna an nei leh ang a, Ni 6 zanah hian Kristian Hla Bu-a hlate hmangin an intihsiak ang a, ni 8 zanah anmahni hla duh zawng an sa ang. November ni 9 zirtawpni zanah Result puan leh lawmman semna neih a ni ang. Intihsiakna hi Hruaina Eng Channel (LPS & Zonet)-ah Live-a pekchhuah thin a ni ang.
- ❑ **Mission Board**
 Oct. 31 - Nov. 8, 2018 chhung hian Shillong-ah Synod Mission Board programme-in Dr. Robert S. Halliday, Coordinator, Mission Board a kal.

Contd...

☐ **Reformation Kum 500 tlin lawm kharna inkhawm**

Oct. 31, 2018 (Thawhlejni) khan Calvin Study Center, Aizawl Theological College bul tumin Reformation kum 500 tlin lawm kharna inkhawm neih a ni.

Kohhran siam thatna (Reformation) hi kum 1517 October 31-a Martin Luther-a'n thuchang 95 (95 Thesis) Saxony Bial Wittenburg khuaa All Saint's Church kawngkhara a tar chhuah ni kha Reformation intanna anga ngaih a ni a. Kum 500 a tlinna ni kum 2017 October 31 atang khan a lawmna khawvel hmun hrang hrangah hman a ni a. Mizoramah pawh Calvin Study Center, Aizawl Theological College bul tumin Chanmari Presbyterian Kohhan Biak Inah hman a ni. Kum khat chhung a lawmna hman a nih hnuah Oct. 31 nilaini khan a kharna hi Khatla North Presbyterian Kohhran Biak Inah neih a ni.

Kharna inkhawm hi Rev. Prof. Vanlalngbaka Ralte, Vice Principal, Aizawl Theological College chuan a kaihruai a. Aizawla Kohhran hrang hrang aiawh te leh mi sawm bikte nen Biak In khat tlatin he hun hi hman a ni. Aizawl Theological College zirlaiten Martin Luthera hla phuah Latin tawng leh German tawngtein an sa a, ATC Male Voice an zai bawk. Thupui, "Envisioning reformation in the 21th Century Mizoram" (Kum zabi 21-na Mizorama Reformation hmathlir) tih a ni a. Rev. Dr. Vanlalchhuanawma'n ngaihnaawm takin a sawi a. Mizorama kohhran hrang hrangte thawhho leh inpumkhat chu hmathlir pawimawh tak a nihzia a sawi.

Lehkhahu pahnih, Calvin Study Center buatsaih chu tlangzarh nghal a ni a. 'Calvin-a zirtirna leh Mizo nun Vol. 5' leh 'Siam Thatna Ropui' tih te chu Pu Thankima'n lehkhahu lo pian chhuah dan leh a chhunga thu awm tlangpuite a sawi hnuah Rev. Dr. H. Vanlalauva'n a tlangzarh a. Heng lehkhahute hi Kohhran siam thatna chungchang chhui zui zelna leh kan ram tan a pawimawhnate tarlanna a ni.

ATC Faculty ten an buatsaih, Saptawnga ziak 'The Reformation' tih chu Rev. Malsawmzoliana'n sawihawna a neih hnuah Rev. Dr. Zaihmingthanga'n a tlangzarh bawk a. Heng lehkhahute hi Synod Bookroom hrang hrangahte lei theih tura dah chhuah thuai tum a ni.

☐ **Synod Relief Fund**

Tun hnaia harsatna hrang hrang neite hnenah Synod Relief Fund atangin chhawmdawlina hetiang hian pek an ni.

S.No	Khua	Pek chhan	Chhungkaw zat	Chhawmdawlina pek zat
1.	Chhiahthlang Hmarveng	Damlo	1	Rs. 8,000/-
2.	Ramrikawn	Damlo	1	Rs. 8,000/-
3.	Champhai Zotlang	Kangmei tuar	1	Rs. 10,000/-
4.	N.E Khawdungsei	Damlo	2	Rs. 16,000/-
5.	Tuidam	Damlo	2	Rs. 16,000/-
			TOTAL	Rs. 58,000/-

☐ **Revival**

Nov. 6 - 10, 2018 chhung hian Synod Revival Camping Center, Neibawihah a duh apiang tan Camping buatsaih leh a ni dawn a. Speaker tur chu T.Upa Johnny R. Lalmangaiha, Nehemia Gospel Team a ni ang. Camping Fee Rs. 100/- mi pakhat tan a ni a, Mut bu bakah Bible, Hla bu, Pen, Note bu ken tur a ni. Camp neihna hmun Neihbawih-ah Chhun dar 11:00 atanga tlai dar 4 inkarah Registration tih fel vek tur a ni a, rokhawlhna lian tak nei an nih loh chuan tlai dar 4:00 hnu lamah in-register theih a ni lo ang. Tun tum camp-ah hian mawhphur turin ITI Pastor Bial ruat an ni.

☐ **Prison Ministry**

Prison Ministry hmalakna kal zelah Oct. 31 & Nov. 2, 2018 khan Central Jail leh District Jail, Armed Vengah te Counselling class neiin hun an hmang a. Nov. 4, 2018 (Pathianni) hian Central Jail-ah hun an hmang ang a, Rev. B. Sangthanga, Executive Secretary, Rev. R. Lalvulluaia, Director, Prison Ministry, Rev. R. Lalnuntluanga, Committee Member leh Zotlang Branch KTP te an kal ang.

☐ **Hruaina Eng FM Radio**

♦ **NOVEMBER 2, 2018 (FM Zoawi Aizawl & FM Lunglei @ 7:30 p.m.):**

Zaipawl - TBZ Zaipawl- Khawvel hrut chhuak ila, **Solo** - Thawhlehnaniropuia-khawngaih chhandamna, **Thusawi** - John Lalhruiatluanga (Sunday sikul thiltum), **Group zai** - Gospel River Band-Beiseina, **Solo** - Jenny Lalruatfeli - PENCHHUAK RAWH LE.

☐ **Hruaina Eng TV Programme**

Susamachar Prasaran Programme

♦ **NOVEMBER 4, 2018 (Pathianni) 5:00 pm. :**

Group/Choir/Solo : Republic Veng Masihi Sangati - Falaksa, Group/Choir/Solo : Khatla Masihi Sangati - Ishu Tera Wada, Sermon : Rev. SB. Gurung- Samai Ka Sudh Upyog, Group/Choir/Solo : Hunthar Kohhran - Ibadat Karo, Group/Choir/Solo : PC Lianhmingthanga - Sahara

♦ **NOVEMBER 4, 2018 (Tv Programme) @ 4:00 - 6:00, 8:00 - 9:00 p.m) :**

Sermon : Rev. Zosangliana Colney - Khawvel Sunday School Ni Thuchah, Weekly Round Up, Pastor Nupui Intawhkhawm